

醫道還元

庚午立春

醫道還元

天華館印

蒼穹聖主降序

天下大矣。民生眾矣。在吾宇內者。無不可共登於仁壽。然而耆老康強者十無二三。夭折疾病者十居八九。二氣乖錯。五行悖亂。使之然也。二氣五行胡爲乖且悖。內邪起而擾之外物紛而誘之。夫豈賦予之有憾哉。亦斯人之自作自爲耳。既作而致之。自不得不醫其戾者使之和。偏者使之正。先天三陽。操百脈之根蒂。後天三陰。握七竅之樞機。分而言之。則身心性命。統而會之。則爲道。不治身無以及心。學不治心何

以入性命之微。且發理不精。無從引人入聖。吐詞不亮。最易誤人強猜。今吾內相呂眞大願化作慈航。盡吐關玄奧窓。小心著成寶典。直括大道隱微。稟命重重。欲拯斯人陷溺。篇成累累。實本吾道推詳。默慰吾衷。樂題數言於卷首。謂之序也可。謂之經亦宜。其詞曰。大化玄宗歸無極。無無參透極品蓮。百脈歸根涵動靜。動是陽始靜是陰。精津血液巡百體。百年一逝體。何存調和五行歸安泰。安土敦仁泰祉臨。轉入紫微勤護守。護國安民守維均。水火二宮生萬象。萬物

生化象歸空。形固質剛傳妙法。妙行歸本法通圓。透出大千千萬理。萬重關隔理潛孚。卅六洞天無餘蘊。餘閒好把蘊推尋。大地山河堪徧布。徧行海內布恩波。內相殷懷全吐露。吐血嘔心露雨深。得法操持能變化。變老爲童化丹砂。不世奇緣成奇遇。奇寶流傳遇當珍。醫道還元元卽道。卽仙卽佛道同途。語語已盡篇中義。中正和平義靡幽。欲明至道求卽是。卽此短幅是弁言。昔

清光緒二十年歲在甲午季秋廿九戌刻降著

太上道祖降序

妙哉妙哉至道淵源。統三教而一以貫之。從未有發其微而抉其奧者。夫道之入也至微。究其合而切於人。不外身心性命。自宗旨不明於世。不知其幾千載矣。談道者不入於雜法。則趨於枯槁。其閒明道之士。把道而立說著書。又皆指東畫西。借端罕譬。雖未嘗不隱寓至理。而無不令人迷目。甚至強猜誤解。貽累無窮。求其源流畢貫。縷晰無遺者。考前代以來。未有如呂眞此書之詳明駁括焉。淺而血脉關竅。週身

之伏根起始。及病態之變遷。治法之委曲。罔不露於紙上。深而大化五行。運轉生剋。亦賅管於行閒。舉登真證佛之階梯。直從調和血脈。徐徐引進。漸而入於深微。要之大道無形。方能造就。諸書皆言丹還則轉老爲少。百疾全消。自吾思之。盡美實未盡善。人雖由性命乖離。致心受其病。而後牽連於百脈。然百脈既受其病。又何暇講龍虎之交。龜蛇之會。救死尙恐不贍。縱有三家相見之法。無從施。兩大綿交之妙。莫可措。執此與語禪真。是猶使餓殍荷千鈞之任也。剝膚

之災未去。奚暇治心完性命。今呂眞之書可謂無量度人。得其要領矣。調百脈使歸安和。不異厥初。此身之還元也。修五德以達到無礙。不愧本來。此心之還元也。煉精歸氣。煉氣歸神。煉神化虛。反其當來。此性命之還元也。醫中有道。道中亦要醫。無非返本尋原之妙。得其會宗。誰非乘雲之客。修到完固。可待出世之期。三教同源。於茲可見。萬法歸一。舍此安求。道不遠人。在斯人之自證。法惟契我。實令我矢辭。此句有脫文

鷺峰佛祖降序

粵稽古來醫家。始以治病發藥名世。終則入道登真者。代有其人。何則。人身百脈。悉符天地奧玄。其精於治病發藥時。已把先天後天。了然於心目。舉人身上下關竅絡繹。與百味之生剋走守。無不貫而徹之。是療疾已得大道之度數。及委心入玄宗。而先天之妙道。遂源流畢達。今覽呂眞是書。可想見其學之所從入。亦由是焉。首透脈絡關津。百端病態。藥法千層。每歸本於河洛。尋將人身真宰地上。搜剔乎盈虛剥

復直合兩大妙機。再舉性命。推究乎無始之始。無終之終。盡賅生天生地奧義。自首篇以迄終篇。實作仙作佛之門徑。了凡入聖之階梯。疾者讀之而愈。愚者讀之而慧生。智者讀之而凡骨卽換。真可謂天人畢貫。三教統宗矣。人生百歲光陰。自當早尋出世妙法。倘令家家熟讀。人人會通。安見疾之纏身。道之或墜耶。我佛梵音。斯人罕達。今呂眞著是書流傳於世。靡特儒生得所益。卽我佛道亦有助也。故持作數言。於篇端。

文昌帝君降序

從來立天之道曰陰與陽。立地之道曰柔與剛。陰陽者造化之根。剛柔者制節之用。宏開萬象。統轄五行。聚兩大之英光。全賦於人身內景。作三元之蒂子。獨靈於物類分承。是故道體玄微。斯人咸具。淵源探索。是誰靡遺。自往昔以迄當今。丹書未曾先治病。由今茲以開來學。玄籍創見號爲醫。如

孚佑呂眞者。願宏救濟。宇宙咸入襟懷。道合方圓。蒼黎素聞遺跡。大凡有大願者必有大功施。今竟於是

見之焉。是書自庚子初年。已有下傳於世之想。無如世類紛紜。多是半疑半信。因之奇珍護惜。不遽直吐真陳。今逢

上帝顰眉。悲生民之陷溺。

諸眞拭目。望斯道之昭彰。會議上奉
通明。乞恩降旨。幸獲大開。

聖聽特勅垂書。此固後世可蒙其休。實上天不靳其惠也。細核是書祕旨。惟以先天大道爲歸。首傳妙法。治身務使後人循途而入。剖眾脈之根原。如犀分水。

詳百端之變態。如珠走盤。身病既已。心疾宜祛。合地符天。賅河圖之生剋。從流反本。見神妙之充周。達到元性回光。大地陽春可樂。先從元命固本。殘年老叟復強。疾疾皆醫。人實可登上界。篇篇是奧。世莫視爲虛文。吐盡血心。成茲金玉。瘁了道貌。作爲梯航。有心人果能把玩潛通。自醒大夢。樂善者倘爲流傳廣布。不少奇功。斯則

呂眞無量渡人之願可償。亦卽

天帝憂道不明之懷堪釋矣。是爲序。

關聖帝君降序

自古醫家相授受。皆謂藝術一流。足以濟人之窘急。顛危。不足以語乎玄微大道。然此特未推究其源頭耳。人受天地之氣以生。內之陰陽五行。卽太極對待生成之理也。脈絡關竅。卽天之黃道赤道。及星辰次舍。地之河嶽津梁也。醫道之通乎天地。已可概見。且推廣言之。人生天地間。實無在非病。身病猶小也。心病更大。至於性命之病。則又微乎其微。深而不易測。此處一受其病。則心病起身。病亦爲之牽纏。人祇知

病之中於身者爲難堪。而不知病之中於心與性命者爲根原。欲已人之病。自不得不把其病之根拔而除之。然則醫之一道。豈徒藝術云爾哉。歷覽諸書。所言者無非皮毛。且言身者不及心。言心又不復透到性命。卽就其治身而論。亦不過外燶。究於身中先天本原。未曾道其一二。亦何怪以藝術目醫學。今觀呂眞之書。則有異焉。言治身卽丹玄之表。講治心實大道之裏。說到修性復命。自是先天無極眞源頭。而病之淺深無不洞達。醫之玄妙。包括靡遺。溯其本來。

性命克完。則心與身皆無病可治。直可造乎清虛。但究乎初學入手。則必由淺達深。所以先醫身。繼醫心。終醫性命。洵確乎不易之次序。

呂眞此書。實廣矣微矣。作續命之寶典。渡世之金丹。可無遺憾矣。吾也生盡貞忠。未講先天玄奧。化乃修習。始悟至道機緘。閱此雲章。含盡苞符之祕。藉茲風世。足慰宏博之懷。先得我心。願斯人共嘗至味。重感天德。歷萬世不易其衡。果能循此程途。何人不造無邊法界。直到功成活潑。奚地不作大化妙行。自醫又